

TARIKH : 18 JANUARI 2023
AKHBAR : BERITA HARIAN
MUKA SURAT : 3

'Strategi serampang 3 mata urus hutang'



Rafizi menerima cenderahati daripada Syed Hussain sambil disaksikan Ahmad Zaini (kiri) dan Azlan pada lawatan Kumpulan Media Prima Berhad di Kementerian Ekonomi, Putrajaya, semalam. (Foto Alrudin Saad/BH)

'Strategi serampang 3 mata urus hutang'

Pendekatan lebih menyeluruh henti ketirisan, kawal perbelanjaan negara

Oleh Rafidah Mat Ruzki
fidahruzki@bh.com.my

Putrajaya: Pendekatan strategi serampang tiga mata bakal diambil untuk mengukuhkan kedudukan fiskal dalam menangani hutang negara berserta liabiliti yang kini mencecah RMI 5 trilion.

Menteri Ekonomi, Rafizi Ramli, berkata ada beberapa strategi boleh diambil kerajaan seperti yang disebutnya pada minggu pertama beliau menerajui Kementerian.

Beliau berkata, pendekatan jangka pendek yang boleh diambil segera adalah dengan mendapatkan nilai terbaik bagi setiap perbelanjaan kerajaan.

"Kita boleh memastikan penyampaian projek dan kecekapan kos setiap projek kerajaan dapat dimaksimumkan.

"Ia caranya untuk menjimatkan wang dengan memastikan ketirisan dapat dihentikan," katanya kepada pemberita selepas menerima kunjungan hormat daripada kepimpinan kanan Kumpulan Media Prima Berhad (Media Prima) diketuai Pengerusinya, Datuk Seri Dr Syed Hussain Aljunied, di pejabatnya, di sini semalam.

Yang turut hadir, Pengarang Urusan Kumpulan The New Straits Times Press Malaysia Ber-

had (NSTP) yang juga Pengarang Kumpulan BH, Datuk Ahmad Zaini Kamaruzzaman, Ketua Pegawai Eksekutif Rangkaian Televisyen Media Prima dan Prime Networks Studios, Datuk Khairul Anwar Salleh serta Pengurus Besar Kumpulan, Jabatan Komunikasi Korporat Kumpulan dan Pejabat Pengerusi Kumpulan, Azlan Abdul Aziz.

Rafizi berkata, Perdana Menteri, Datuk Seri Anwar Ibrahim, sendiri ada menyebut bahawa beliau berpendapat sekurang-kurangnya sejumlah RM10 bilion boleh diperolehi segera daripada sistem sedia ada dengan menghen- tikan ketirisan.

Beliau berkata, dengan memperuntukkan semula serta memberi keutamaan dalam perbelanjaan negara, ia mampu memperkuatkan kedudukan fiskal.

Struktur sumber ekonomi

Namun, beliau berkata, pendekatan itu saja tidak mencukupi, justeru perlu ada perluasan untuk pungutan hasil negara.

"Ada beberapa pertimbangan dan keputusan dasar yang perlu kita ambil tetapi saya berpendapat ia memerlukan tempoh masa sedikit lama untuk dilihat kerana impaknya lebih besar.

"Ia membabitkan keseimbangan pertumbuhan dengan melindungi sektor sewajarnya dengan memastikan apa yang kita akan lakukan tidak memperlahankan pertumbuhan yang disasarkan," katanya.

Rafizi berkata, strategi ketiga yang boleh diambil adalah dengan segera menstruktur semula ekonomi negara.

Beliau berkata, ada keperluan mendesak untuk menaik taraf

ekonomi negara bagi membolehkan Malaysia meningkatkan perkhidmatan dan syarikat bernilai tinggi.

"Apabila pendapatan rakyat meningkat, ia juga menyumbang kepada hasil negara.

"Sudah jelas apa yang perlu dilakukan, namun ia harus dilaksanakan secara berperingkat-peringkat," katanya.

Pada masa sama, Rafizi berharap seluruh negara memahami bahawa untuk tempoh satu dua tahun ini, kedudukan fiskal perlu diperkuatkan.

Beliau berkata, untuk itu, kerajaan perlu melakukan beberapa perkara bagi membetulkan kedudukan negara dengan segera.

Rafizi berpendapat, selepas satu atau dua tahun, apabila kedudukan fiskal semakin kukuh, ada laba ekonomi kepada negara yang akan dirasai oleh rakyat dalam tempoh dua atau tiga tahun mendatang.

"Konsepnya samalah kalau demam kena ambil Panadol (ubat). Awal-awal tu ada orang mungkin tak suka Panadol, mungkin tak suka ubat tapi kena ambil ubat dahulukan.

"Tapi ia (hutang negara) bukanlah sesuatu yang berada dalam keadaan yang berbentuk krisis yang perlu panik ataupun kerajaan berada dalam keadaan yang begitu terdesak.

"Kita masih ada ruang itu cuma sama macam dengan demam, kalau demam buat-buat tak makan ubat, tak ambil kira tak berehat kita tak ambil ubat beberapa perkara ia akan jadi semakin teruk," katanya.

Berikutan itu, beliau berkata landasan pengurusan kewangan negara perlu diubah sekarang.